

名

山

藏

名山藏卷之三十八

晉江何喬遠

分藩記三

谷王

韓王

藩王

安王

唐王

郢王

伊王

谷王穗高帝十八子也與蜀王同母國宣府古上谷地故曰谷鄙於寧成祖靖內難寧有佐助功而王自歸建文帝使門金川靖難師渡江王見建文帝不競開門迎成祖成祖德之既卽位賜王樂七奏衛士三百金銀槍大劔黃金三百白金三千綵幣三百匹鈔

三百錠馬四匹金籠鞍轡二副歲增米三千石與寧王並徙內地寧王南昌谷王長沙王之國復賜馬三十四匹鞍二副銀五百兩鈔三萬六千錠錦十疋紵絲綾羅各六十疋絹百九十疋羊二十羴酒二百瓶其從官賜宴鈔甚厚王居長沙橫甚忠誠伯茹瑘衡山人太祖舊臣也道歸里不謁王王白帝帝下堦獄竟死王益養死士藏亡命作舟艦弓弩器械教習兵戰大創佛寺私度僧千人呪詛縣官兩自祈祝與都指揮成宦者智典寶信臆造圖讖謂十八子當有天

下而占之曰我也我高帝十八子號成曰師尚父

信曰國老令公使智致蜀王帶爲隱語匿帶中陰約與起事召匠製機燈選疏士教之音樂而以獻請得上元入禁張燈樂人進侑食於內庭王賦國中及干蛄蟧之轉取於游觀輦輦花石無遠近國人皆怨長史盧廷綱數諫王王誣廷綱誹謗磔殺之指揮彰舍人常泄王事咸死亡敢諫者張興者王府中都督密言成祖成祖曰穗朕弟興曰雖然請察之成祖曰吾察之興還白皇太子南京曰臣所奏皆旦夕急上猶徐徐爾卽不信急時請得無隨坐乎會蜀王子悅燔逃王所王匿之詭衆曰建文君尚在金川之役我出

之今居我所我將爲伸大義發有日蜀王聞大懼使
儀賓瞻上變上曰有是哉立歸悅燭於蜀召王京師
王猝就徵旣至示之蜀王之章自服永樂十四年十
月甲申成國公勇都察院左都御史觀率文武羣臣
奏曰切聞封建親支藩屏宗社傳之萬年與施罔極
聖王之制也周有管蔡漢有淮南聖賢之君至爲割
恩正法誠以宗社安危有天下者不以私害公公王
穗淫心不度詐爲圖讖妖言陰養死士演習兵法
戰船於瀏陽屯田積穀廣設厰皆淬礪器械都指
成尊爲尚父宦者智信嚴以國老令公機匠製燈

夫習樂計獻內廷伺間觀隙詐留蜀王子托之革君
蜀王出裏譬不悛改私度僧尼禱且呪殺諫臣廷綱
磔亡罪人投之水賴天地宗社之靈蜀王忠貞發厥
奸謀陛下卽篤親親不忍如公義何臣等謂谷王穗
大逆不道誅劉不可赦謹昧死聞成祖曰穗朕弟楚
王楨周王橚蜀王椿遼王栢寧王權藩王模其與諸
王雜議十五年正月甲辰楚王楨等謹上議谷王穗
違棄祖訓陰結惡黨謀不軌天地所不容祖宗所不
佑臣等皆兄弟謂宜按法誅惟大兄皇帝陛下裁門
內恩所以昭姦示憲於天下也成祖曰穗朕第二月

癸亥成祖曰小千穗反性滅倫自作孽于不靖賴天地宗社之靈蜀王忠孝發爾陰謀顯暴不可覆諸生羣臣咸求昭討朕隱于懿親削爾王降庶人嗚呼省念哉乃誅所與共謀而都督張興釋不問王閼戶自焚死獨其子賦煥有後爲谷庶人

韓憲王松母曰周妃洪武二十四年封開原與藩王皆以幼未之國上使王繇周歷秦晉抵燕齊藩王自齊歷燕晉抵秦周見于五王以敦友第之好亦游觀諸國都王聰明機辨通今古恭謹無過永樂五年竟未之國薨子恭王冲域立憲王之薨也恭王幼亦未

之國仁宗卽位徙國平涼明年與襄陵王冲秋樂平
王冲焚竝召至頃之各獻詩頌仁宗嘉嘆勅獎賜白
金鈔幣有差正統元年上書言邊務賜書褒答立三
十一年薨懷王範圮以庶子立三年患陰厥薨亡子
其初封開城也靖王範圻以庶弟立五年其初封西
鄉也惠王徵針以庶長子立二十年其初封高陵也
悼王偕洸以庶二子立六年亡子其初封廣安也康
王偕灃有善行以庶弟立二十六年其初封彰化也
昭王旭樾學問忠孝能詩善書時時推惠於其國中
以庶長子立三十一年其初封渭南也定王融燧以

嫡子立二十九年王通文藝曉彈射有才略然嗜利
用匪人爲暴橫子謨塏先王卒以今王朗錡追諡安
其初諡悼恭世子也朗錡立十九年薨其初鎮國將
軍也今王景滋立長孫逵杞

韓憲王四子

恭王

襄陵王冲秋王孝事父母正統己巳率師勤王英宗
後元年惠王奏王性至孝母年八十一得危疾剗股
肉作汁剪鬚和之爇香禱天母泄下取嘗之數日寧
王年五十有七故抱氣羸悴自母病解氣積遂散誠

孝感通顯有徵驗上賜勅獎諭憲宗初虜入河套王
請率子孫及壻從軍褒詔不許爲人忠孝讀書節儉
好禮爲藩輔冠年七十餘無疾考終平生先後蒙聖
書褒詔者六薨子範址嗣武宗初惠王奏王讀書守
禮嘗刲股愈母父薨刻木供奉忌日必哀時新不薦
不敢食待諸弟友愛賙軍較貧乏葬其不能舉者年
七十餘猶北向扶杖拜祝節慶上致書獎諭曰敬問
高叔祖襄陵王年高德盛孝義彰聞朕不勝嘉悅夫
宗室天下表有此善行宜用旌庸尚懋初心允終令
德俾諸後進觀法同歸王妃劉氏亦有賢行朝命譔

文立石王薨子徵鈐嗣鈐薨子鎮國將軍偕洌孫旭
撞未封皆先卒自冲秋至于旭撞五世同居孝友作
述嘉靖十一年賜璽書會孫融焚嗣嘉靖三十二年
以與長樂王融煒慶陽王謨塾及諸宗室二百餘人
訐奏定王爲奸利竝革祿焚薨子謨塏嗣塏薨今王
朗鑽嗣

樂平王冲焚憲宗十七年康王偕濤奏臣會叔祖樂
平王冲焚登年八表累善百行乞賜褒旌爲宗室勸
憲宗致王書曰韓王奏會叔祖年高德邵善行昭彰
朕聞甚悅足以增光本支永楷親族究厥底歸且賢

東平其益加調攝頤養天和副朕瞻念之意俟薨子
範塲先卒孫徵鉅嗣鉅薨子偕泐嗣泐薨長子旭榘
先卒孫融熒嗣熒薨今王謨桐嗣

臨汾王冲燭絕除

韓恭王五子

懷王

靖王

褒城王範堦堦薨子徵鉅嗣鉅薨子偕泐嗣泐薨子
旭欄嗣欄薨子融烝嗣烝薨子謨垣嗣垣子即銓未
封卒亡子除

通渭王範墅墅薨子徵鉢嗣鉢薨子偕涇嗣涇薨子
旭楊嗣楊薨子融炆嗣炆薨今王謨塙嗣長子朗鉢
平利王範壑亡子除

韓靖王二子

惠王

漢陰王徵錠王薨無嗣其疾也妃父周恂取他人子
爲王子旣長得封成化十四年事覺斬恂沒其家受
封男女皆賜死追削王諡降庶人除

韓惠王七子

偕沔未封卒

悼王

康王

偕泓未封卒

偕溥未封卒

高平王偕欒欒薨子旭樽嗣樽薨子融炗嗣鎮國中尉旭柳炗父行也私挾妓外遊炗通其妻謀殺之事覺謫爲庶人肅帝十五年也除

西德王偕靜靜薨子旭縱先卒孫融燿嗣燿薨今王謨埴嗣

韓康王七子

昭王

隴西王旭林絕除

寧遠王旭桢桢薨子融煥嗣煥薨子謨堯嗣堯薨今
王朗鎮嗣

旭桢未封卒

長泰王旭橫橫薨子融焯嗣焯薨子謨墳嗣絕除有
宗室

永福王旭檀檀薨子融焚嗣焚薨今王謨塤嗣

建寧王旭梢梢薨子融炯嗣王貧以受封金冊質金
於宗室偕汰汰子旭棟難之以多取息事聞坐廢爲

庶人除有宗室

韓昭王四子

定王

長洲王融煖煖薨子謨塽先卒今王朗說嗣

崑山王融煖煖薨子謨塽嗣塽薨今王朗緯嗣

長樂王融煖煖薨今王謨埒嗣

韓定王五子

安王

高淳王謨塽薨今王朗鎔嗣長子璟渾

休寧王謨塽薨子朗鏐嗣絕除

卷一百一十三
慶陽王謨墊墊薨子朗鋌嗣絕除

通安今王謨埏長子朗錯

韓安王十子肅帝末年以宗室祿不足詔身不及王者許其嫡長子繼王餘子如故秩郡王支絕虛其爵不得繼著爲令安王以世子不及王王其嫡子朗錡餘子皆封鎮國將軍

韓王九子

今王

崇明王璟清薨子遠穆

長吉王璟瀾長子遠植

保德王璟號薨子未名

綏平王璟洛洛薨亡子除

咸陽王璟濛

襄丘王璟澤

固原王璟渭

九子璟余

臣爲郎時韓自王而下凡三千七十有二宗

藩簡王模國潞安其初潞州也母趙貴妃王以高帝二十四年封成祖六年之國惇靜守禮在位四十一年薨諡曰簡子侁焯以武鄉王嗣在位二十六年薨

諡曰康子幼塋嗣有賢聲在位五十八年年八十薨
諡曰莊子詮鉦以西陽王嗣在位十九年薨諡曰恭
子勛壯以福山王先卒諡恭和恭和王子胤橙亦蚤
卒再從弟胤移以靈川王嗣胤移者恭裕王勛潛之
子榮懿王詮銖之孫而榮懿王莊王次子也胤移進
王追諡榮懿安王恭裕惠王而諡恭和靖王胤橙懷
王王在位十九年薨諡曰憲王秀傑耽文儒講德脩
道子恬皎嗣好學工古文詞妙於聲律在位二十九
年薨諡曰宣今王理堯嗣王仁孝効恭於天子穆廟
下璽書賜棹楔世子效鏞

審簡王七子

康王

陵川王佶燿燿薨長子幼墜不及封子詮鏐嗣鏐薨
長子勛讓不及封子胤杲嗣杲薨今王恬燿

平遙王佶燿燿薨子幼墜嗣亡子除有宗室

黎城王佶燿燿薨子幼墜嗣亡子除有宗室

稷山王佶燿燿薨子幼墜嗣墜薨子詮鏐嗣鏐薨子

勛沂嗣沂薨子胤柯嗣柯薨子恬燿嗣今王珵垣

沁水王佶燿燿薨子幼墜嗣墜薨子詮鏐嗣鏐薨子

勛瀋嗣瀋薨子胤穰嗣穰薨子恬燿嗣燿薨今王珵

堦長子效鏗

沁源王佶焯焯薨子幼埼嗣埼薨子詮鍾嗣鍾讀書
好文薨子勛溱嗣溱薨長子胤楊不及封孫恬焯嗣
焯薨今王瑄墀嗣長孫效鏐萬曆十五年坐逼死族
祖降庶人

審康王七子

莊王

清源王幼圻博學多著述圻薨子詮銘嗣銘薨子勛
瀾嗣瀾薨子胤杓嗣杓薨今王恬焚

遼山王幼璽成化十九年王妃薨來辭內官遣祭憲

宗曰禮也而王辭豈以爲不耶無他也王承之王薨
子詮鉞嗣鉞薨子勛澄嗣澄薨今王胤杞嗣長子恬
煇

內丘王幼墳墳薨長子詮鉞不及封孫勛滌嗣滌薨
長子胤秘不及封孫恬熙嗣熙薨今王珪壘

廣宗王幼埭亡子除

唐山王幼塢塢薨子詮鉞嗣鉞薨子勛激嗣激薨子
胤樛嗣樛薨子恬煇嗣煇薨長子珪鄩

永年王幼塢塢薨長子詮煇長孫勛浚皆不及封曾
孫胤樛嗣樛薨子恬煇嗣煇薨子珪封嗣子效璽

潘莊王七子

恭王

靈川王詮鉢以孫憲王追諡安子勛潛以子憲王追諡惠憲王既進封遂進封惠王次子鎮國將軍胤樔爲德平王以續靈川之後而靈川之郡爵除樔薨今王恬燁嗣長子瑄雖

宜山王詮鏞鏞薨子勛渥立長子胤樔得罪於父長孫恬燁

宿遷王詮鏞鏞薨子勛澤嗣澤薨子胤杙不及封孫恬煙嗣亡子除有宗室

吳江王詮鏗鏗薨子勛清嗣清薨子胤杙不及封

王恬糕

定陶王詮鏐鏐薨子勛湮不及封孫胤樾嗣長子恬
鯁

雲和王詮鑪亡子除

潘憲王四子

宣王

鎮康王恬焯穆宗朝以孝義旌亡子除

恬熹天

安慶王恬燿穆宗朝以孝敬旌

卷之六十三
三
藩宣王七子

今王

保定王瑄坦

德化王瑄機

靈壽王瑄塏靈壽而下以例不得封藩恭於天子天子悅之與之封而不祿

六合王瑄埏

瑄睦

七子未名

今王一子

臣子效鑪

臣爲郎時藩自王而下凡九百九十有二宗

安惠王楹洪武二十四年封平涼王二十七年薨亡
十國除仁宗初以平涼封韓景帝中使襄陵王冲烱
奉惠王祀故襄陵祀安王

高定王桎國南陽母李賢妃以高帝二十四年封成
祖六年之國王敏而易王二十五年薨子瓊烱立是
爲靖王王綜覈有桀黷爲成祖所喜永樂中入朝五
日三召見王六年薨妃高氏未冊殉詔封靖王妃王
弟瓊烱立是爲憲王王四十八年薨臨終善誨諸子

爲詩永訣子芝址立是爲莊王王孝事父母被服儒
行王十一年薨子彌錡立是爲成王王肆力經史屏
几書訓言諸宗有飾裘馬買名姝者憎之若浼日與
文士觴詠士大夫道南陽無不求見王孝宗朝奏朝
廷待親藩生爵歿謚親親至矣間有惡未敗聞沒獲
美謚魯荒秦愍殆豎明初請今勘實用寓彰彊禮部
議覆從之且言王見及此誠可嘉尚請降勅獎諭徧
布諸王詔可武宗出游王作憂國詩八章王三十五
年薨亡子愛文城子宇溫賢立爲嗣是爲敬王肅帝
十八年王以賢孝旌久之作大廟獻黃金千白金萬

助大工賜玉帶益祿歲百石王三十六年薨子宙林
立是爲順王王三年薨今王碩熲立

唐定王三子

靖王

新野王瓊燁定王庶子王薨諡悼懷子恭簡王芝城
立王有繼妃曰邢太妃甚賢善爲王持家薨子宣懿
王彌綸立薨子榮僖王宇滬立薨子康靖王宙杭立
薨子碩燦立爲今王

憲王

唐憲王六子

悼簡世子芝塏

莊王自舞陽王封

三城王芝塏通經著書精書畫好禮有名弘正間亡
子以蕩陰王子鎮國將軍彌瑩奉王祀爵除

庶人芝坦封新城孝宗十三年坐炮烙刑人子彌鏡
助爲虐除

承休王芝垠王靖王繼妃焦氏出妃愛之每入宮母
子坐食相對不爲禮遇節旦召樂婦入戲笑莊王啓
焦欲責之焦不問王值其出宮召詰之語不遜王忿
觸之芝垠詈王箠王之侍從母焦怒持鐵槌槌王門

王閉不敢出妃弟璟遂與芝垠誣莊王毆罵繼母意圖不軌王亦奏芝垠浮亂事王坐革爵憲宗二十年也孝宗七年復之子彌鉞立有賢聲葬之日牽紼而號者數千人子宇淵立淵薨子宙枝好學識典故不及封子碩燦爲今王

蕩陰王芝垠倜儻好文不問家食貧而好施薨子彌鏐立長子宇澄賢不及封子宙棨立棨薨亡子除有宗室

唐莊王五子

成王

浙陽王彌鏹亡子除

文成王彌鉗穎哲儉素善詩賦書隸廣置園圃亭榭以延賓客士大夫過南陽皆造門求見子宇溫嗣王追諡王爲恭郡爵除有宗室

郢城王彌銀銀薨長子宇清不及封孫宙桃立桃薨亡子除有宗室

衛輝王彌鎬鎬薨子宇漳立漳薨子宙桐不及封孫碩煥立煥薨亡子除有宗室

唐敬王一子

順王

唐順王一子

今王

今王五子

器極餘子幼

臣爲郎時唐自王而下凡九十有三宗

郢靖王棟母劉惠妃高帝二十四年封安陸王二十
四年薨妃郭氏武定侯英女也王薨亡子有女四人
郭妃對鑑自形遺女而經以從王

伊厲王憐國洛陽母曰葛麗妃洪武二十四年封王
好武不能宮居喜負劍馳馬有犯轡者手斬之血濺

王衣王則好衣其血濺者平居髡裸男女雜坐之故
諡厲王二十四年薨子顓缺立是爲簡王王求府太
守亡廢縱其中官擾民洛陽人苦之河南太守李驥
稍稍操以法王故誣驥他罪章帝釋驥械治其府中
人睿帝時進表文不恭謹屢被讓王四十年薨子勉
堡不及封孫諲釁立是爲悼王追封勉堡爲安王悼
王十年薨亡子弟諲錡以郟城王進封是爲定王王
好學崇禮居喪過哀忌日哭泣終日不食歲時祀先
王致齋于外郡王鎮國非慶賀不褻見望闕北首過
廟則趨民間高年者宿必禮下之縉紳士夫進冗虛

心延問王三十三年薨子訐淵立是爲莊上王十六
薨亡子弟訐淳以濟源王進封王讀書好禮事其生
母至孝母沒廬神主殿側者三年十六年薨子典模
以嘉靖二十三年立爲王以四十一年降爲伊庶人
庶人懷而恨多縱府中人持河南吏短長吏不如指
則旦夕斥去卽去大遭其折辱縉紳大夫過河南有
徑外郊不入朝者王使迫挽其車辱以非禮卽入朝
者王必多爲難河南通判某者素不善事王不內王
干請及去王使數十人待之途拔其髮髭大遺於其
口中御史某按河南從北卽山外過王要笞之往來

縉紳率迂折從他境其土之仕於外者寧久官不敢
歸家河南守相長吏莫敢問王以此自得計太守張
柱者山東人公廉不發私書旣至官則較尉數百人
持太守事太守不得有所平反柱戒門曰有內伊較
尉者死較尉不得見太守太守剖斷自如王怒召優
人守府門爲太守家人淫奔瀆亂之戲伺太守出俳
弄之王蕭牆微請垣許之則奪郡治及學官地以廣
宮郎中陳大壯者居鄰王王亦求其居弗與王使數
十人從大壯卧起有所食輒奪之大壯伶俜市中適
府獄戶開大壯竄入與囚同食數月乃出王使人從

大壯如故大壯竟餓死其家不得收屍王所爲宮重
城層臺傲闕下錦衣官較宣詔陝西從洛陽過王擁
錦衣人召官屬迎詔王私製一黃紙爲詔書捧入內
不開宣衆問何詔也王曰詔耳妄問者死其夜與其
子褒燔大張宴樂至曙令其府中人皆稱千歲若謂
伊親於天子天子密詔之也王攘人妻女至四百餘
口奪民廬舍至三千餘誑脅人財至三萬餘金晝閉
河南府城大選民間女十二歲以上者七百餘留其
姝麗者九十人不留者令具金贖厭惡者委投圈虎
事聞上革王祿三之一令王壞僭城歸奪女出羣小

人付有司王自如禮部數牒促之河南守相持牒入
王曰安用牒是爲我障橛我猶嫌有畫河南守相乃
自召卒其僭城墮未半持挺者數百人出王宮逐
卒卒或墮或壓多死者河南人怨王皆曰伊王反矣
河南僉事林騰蛟具疏從都御史堯臣御史鯨以聞
王毒殺之章下禮部三法司具言伊王典樸好亂暴
棄禮義違祖訓失藩臣節陛下念親親曲赦再四不
痛心湔躬回好日甚臣等謂宜如徽王載堉故事降
爲庶人禁錮高牆削除世封制曰可
伊厲王一子

簡王

伊簡王二子

安王初以庶子封洛陽以子悼王進封追諡安郡爵除

光陽王勉圻無子除

伊安王四子

悼王

方城王諱鑠鑠薨子訐注立注薨長子典榕不及封孫褒煊立煊薨今王珂墻立

西鄂王諱缺缺薨子訐潔立潔薨亡子除有宗室

定王初封邾城以進封郡爵除

伊定王二子

莊王

敬王初封濟源以進封郡爵除

伊敬王二子

庶人典模

萬安王典模櫝薨今王褒煥立

伊庶人一子

庶人褒以父故謫竟絕

臣爲郎時伊凡八十宗

名山藏卷之三十九

晉江何喬遠 譔

分藩記四

成仁宣三廟子

成三子

仁宗而外凡二王

漢庶人

趙王

漢庶人高煦母徐皇后太祖時以燕王子封高陽成祖卽位封漢王狙詐多智以材武自負也初太祖召諸王子學京師諸王子皆畱心翰墨王獨嬉遊輕躁太祖小祥王與燕世子入祭外舅徐輝祖密奏高煦勇悍無賴非惟不忠抑且叛父請建文君畱勿遣輝

祖弟增壽及駙馬都尉王寧力庇之竟遣還將行入
輝祖廐盜其驪不辭朝去過涿殺涿驛吏燕王靖內
難謂王武使從師王領勁騎接戰白溝東昌有功及
浦子口燕王與南將盛庸戰敗矣王搏胡兵至燕王
撫之曰勉哉予病矣世子多疾定難以功王又力戰
破盛庸世子爲人仁庸體充盈而王長七尺餘輕趨
挽千鈞兩腋若有龍鱗者數片燕王以類已愛之旣
有天下密召淇國公丘福駙馬都尉王寧學士解縉
等謀所立福寧言二殿下爲陛下靖難有功功高於
世子立子以長平世之道也解縉頓首曰以臣所見

異是世子忠敬仁孝天下莫不聞異時守成令主也
且夫以孽奪宗爲亂道王從上田射生多軍士有二
鳥竝柯棲連中之上喜漢王技至此乎解縉從旁對
曰所謂賢王者孝友慈明爲藩國長若夫挽弓命中
洞胸貫顙猶一卒也陛下誠愛王不宜以此爲王譽
上竟立世子爲太子封王漢國雲南王失望不行曰
我何罪處我荒徼已又改青州王曰我何罪處我瘠
土是時上將巡北平使太子守南京王請從太子居
南數行離閒私譖解縉於上上至徵太子師傅皆繫
獄而解縉亦爲王寤死獄中王居南京乘閒請天策

爲護衛擁軍三千不隸於伍符輒自詫天策上將唐
太宗之號也長史瑛善岐鳳數直諫王怒附繫之
詔獄兵馬指揮野驢執治漢府不法人王愬之以鐵
瓜王數體解無罪人投之江漆革爲舟以習水戰造
大量收祿米縱護衛軍強取民間貨財或至盜劫永
樂十五年上南還聞王不法事褫王衣冠繫之西華
門數日皇太子力拯解上曰吾爲人父不知子耶彼
方以秦王世民自與居爾於建成乃更王封於樂安
曰是快快者必爲變處之樂安朝發夕擒之矣王至
樂安深懷怨望異謀益急私造火器籍壯丁爲行伍

破獄出死囚厚養之集旁近無賴壯子弟及逋逃賜
銀幣編隊甲給諸衛所兵器行其暴盜而境內騷然
上崩太子踐祚爲昭帝王數遣人窺闕昭帝知之顧
益厚遇王昭帝崩章帝卽位有所求請輒不得益怨
望遂發兵反長史李默諫不聽乃作五軍指揮王斌
等將四軍諸子將一軍而自將中軍僞授官號私於
英國公約爲內應故御史李濬者樂安人方持服家
居匿妻子變姓名馳告闕下王知之使使者追捕不
及使者還王怒磔之

濬字伯淵漢庶人既平章帝嘉

達東守臣懈於邊備虜數寇盜命濬往巡撫濬至以

禦戎之道莫重於守於是高城深池謹烽堠鳴刁斗

分纂記

揀精銳士馬分布要害暇則躬督屯田區畫措置繇是邊儲充實甲兵堅利瀚海以東悉平悉寧進左副都御史勅便宜行事在邊八年以疾乞休未幾卒侍郎王偉銘濬墓謂濬小心愼密至誠無僞其在朝則比之石慶在邊則比之趙翁孫而王所私遣人英國公所者英國公

亦繁以聞上不忍加兵使中官泰諭王王盛陳兵衛見泰南向坐言曰我何負朝廷哉靖難之戰非我出死燕之爲燕未可知也未樂中太宗皇帝削我護衛徙我樂安讒我者誰耶今固望縣官優我而輒云祖宗故事故事我豈能鬱鬱無動作汝循營視漢士馬豈不可以洗洋天下速歸報急縛朝中奸臣來徐議吾所欲耳因上章指斥大行皇帝與上所爲名夏原

吉等奸臣索誅之上嘆曰高煦果反夜召夏原吉楊士奇楊榮問計楊榮曰彼謂陛下卽位新必不能自行若自行出不意且大懼破之必矣上問原吉曰於卿何如原吉曰漢王鷲而寡謀外憚中懼臣嘗見其命將而色變將出師而泣知其無能爲也且兵貴神速楊榮策之善上立召英國公輔下親征詔告高煦罪於天地宗廟百神八月發京師英國公輔少師義少傅士奇少保原吉太子少傅榮太子少保中尚書淡本通政使佐從以武陽侯祿爲先鋒是時漢方約內應取濟南濟南守吏覺之不得發漢將榮者南人

請引兵趨南京漢諸將曰南人謀家耳奈我輩何庚
辰武陽侯至樂安城下約戰上令大軍蓐食兼行辛
巳昧爽上軍城北壁其四門諸將請攻城不許諭王
書不荅乃使射詔城中城中人多欲劫王獻者王驚
遣人詣行幄請假一夕訣妻孥以明日自歸許之其
夕漢盡焚兵器反書壬午上軍城南漢將斌曰就擒
辱也何如戰死王曰城小乃從間道衣白席藁出見
上頓首自陳上赦王罪使召其諸子解兵令武陽侯
祿尚書本旋定城中改樂安州曰武定乃班師還京
降王爲庶人繫之逍遙城誅所與謀者六百四十餘

人減死戍邊者千五百餘人實口外者七百二十七人獨長史李默免上之逍遙城視庶人庶人足鐐於木運木撞上上不期而踣遂覆巨鼎炙之庶人負鼎鼎動須臾死諸子皆死初昭帝爲太子上時爲太孫與庶人從上陵太子體重多踣高輿後言曰前人躓後人警太孫曰戒之更有後人警後人也

庶人十子

世子瞻垣先庶人卒

庶人瞻圻圻憾父殺其母證父於朝父惡之言於昭帝褫王守陵鳳陽誅其紀善李遜

名一第
瞻盜封濟陽

瞻域封臨淄

瞻埤封昌樂

瞻澤封淄川

瞻坪封齊東

瞻塹封任城

瞻塹封海豐

瞻邨封新泰已上皆坐逆幽死

趙王高燧國彰德母徐皇后王寡學好武成祖靖內
難與有功自喜負與漢庶人謀奪嫡數密譖皇太子

宮僚永樂二年封趙居守北京多用邪人左道上怒
誅其長史禡王冠以皇太子力抹免上晚節多疾皇
太子視國事宦官黃儼江保者素邪嬭皇太子踈斥
之遂數離開皇太子於上皇太子希進見二十一年
王入朝留京師儼等奏言上屬意王從王來者指揮
孟賢等皆喜欽天監謝成過賢所密言曰成觀天象
且有易王之變旬月間耳賢益喜與其弟三軍人恕
子和正覲等僞爲遺詔通內近中貴人謀鴆上幸宮
車宴駕卽劫出禁仗符璽僞詔從中下立王爲天子
然未以告王曰待事成總旗王瑜知其謀詣闕上變

上命急捕賊御右順門親聽之立誅趙王之人顧王

曰爾爲之邪王齒擊不能聲是時也又以皇太子力

抹免

瑜山陽人正甥也正欲爲趙王舉事私告瑜瑜大驚舅氏奈何自赤族耶正夢欲殺之瑜即上

變太宗嘉之授瑜正千戶累官右都督食事銀印充右副總兵鎮守淮安瑜雅尚文學門杜私謂爲

鎮守寬大不猛以德服人每讀忠臣烈上傳慨然歎息遇奸臣賊子則切齒恨之但其上變中有枉死者

及卒之日自束兩手如高懸然號呼抹解上乃選廷臣之賢者輔王以國

子監司業趙季通爲左長史董子莊爲右長史二人

爲王講說經書推理驗事於是王知禮重此兩人循

禮悅孝事太子甚恭太子卽位爲仁宗王之國遣季

通力辭常山左右兩護衛不許往復再三仁宗書諭

曰賢弟忠愛河間東平亡踰也盛心不可固違今令

兵部存留中護衛添設羣牧千戶一所王國中惟兄

與弟如手如足銘著於心何日忘之

趙季通天台人縣教官舉任吉

安未豐知縣調龍溪尉寬厚愛人未幾初除博士陞

司業爲趙府長史與董子莊端確詳雅同心輔王

當時論親藩輔導之良趙董爲極選宣德初漢庶人反漢黨有誣趙者

章帝擒漢班師羣臣迎於單橋尚書陳山請曰漢趙

二王爲謀久矣漢擒趙必不安不如出不意移師襲

之上右顧而問楊榮對曰善左顧而問蹇義夏原吉

對曰善榮退使楊士奇草勅詰趙士奇曰事未發以

何爲辭榮曰謂漢詞連趙士奇曰漢連趙誰證哉大

行皇帝在東宮時趙諸羣小僞詔邪謀發露有狀尚爲百口抅解大行皇帝僅二弟陛下僅二叔有罪者不可怨無罪者不可薄要使主上不受葛藟之媿而後羣臣有以見大行皇帝地下榮曰善與義原吉具以士奇言白上上止上還京師鞠漢獄漢庶人復自言連趙諸臣言趙者益多趙王聞之憂懼不知所出上召問士奇士奇曰今陛下宗室惟趙最親可惑衆口哉上曰漢趙雖兄弟不同德矣皇考於趙最友朕惟一叔奈何不愛諸臣言趙益多朕行以漢詞與諸臣彈章示之乃遣廣平侯容都御史觀往諭容觀至

趙王曰吾生矣因盡納護衛上表謝恩上繇此待趙
王益厚王二十八年薨諡曰簡子惠王立惠王名瞻
煇立二十三年薨子悼王立悼王名祁鉉立六年薨
子靖王立靖王名見濟王狎戲酗酒怒輒以刀劒刺
刺人重篲殺之或劓面碎首南樂湯陰二王王叔父
也而亦欲殺之又強買良家子女留止樂婦後宮成
化中革冠服削祿三之一後復冠服立三十八年薨
子莊王立莊王名祐杲好酒色立三十六年薨子康
王立康王名厚熹讀書好禮孝事其祖母妃妃疾爲
嘗糞嘉靖中彰德饑王請辭祿以賑之朝命不許世

宗南巡王迎駕甚恭王招致賓客文酒游宴有淮南
梁孝之風其後與其次妃反目自縊立四十年子昭
定王載培世孫翊錙皆先王卒今王常清立進昭定
王爲恭王世孫爲安王王跋捐產以採荒

趙簡王二子

世子瞻坂先王薨諡悼僖

惠王以安陽王進王

趙惠王八子

悼王

臨漳王祁鋈坐與靖王同虐革服減祿薨子見惠立

惠薨子祐棧先父卒棧子厚炯立炯薨子載塏立塏
薨子今王翊翎

湯陰王祁鏞坐與靖王同虐革服減祿子見準以忝
繼母賜死除有宗室

襄邑王祁鋳薨子見滄立亡子弟見沂嗣沂薨子
祐樺嗣樺薨子厚燔嗣燔薨子載垠以擅婚事例除
有宗室

洛川王祁鋳薨子見渥嗣渥薨子祐架嗣架薨子
厚烙先父卒烙子載堯嗣堯薨子翊銘嗣銘薨子今
王常渲

祁鉞天

南樂王祁鉞坐與靖王同虐革服減祿鉞薨子見瀾
嗣瀾薨子祐楨嗣楨薨子厚鋤嗣鋤薨子載撫嗣撫
薨今王翊鏑

平鄉王祁總總薨子見洸嗣洸薨子祐楸先父卒楸
子厚煒嗣煒薨子今王載圻以私收濫妾降封

趙悼王三子

靖王

汝源王見淇淇薨子祐桐嗣桐薨子厚煇嗣煇薨子
載壘未封卒絕除

昆陽王見治絕除有宗室

趙靖王三子

莊王以清流王進王

唐安王祐枳枳薨子厚燾嗣燾薨子載堂嗣堂薨子

今王翊鐸

結打天

趙莊王五子

康王

江寧王厚煉煉薨子載堞嗣堞薨子今王翊銘

光山王厚輝絕除

秀水王厚燠絕除

厚燠天

趙康王二子

獲嘉王載培以孫常清追諡恭

成臯王載堉康王之綏也對侍兒咄咄自語若有所
恨者殆爲妃與成臯王外論洵洵於成臯王先是洛
川王翊銘爭民田彰德通判田時雨撻其奴論戍亡
何湯陰王府奉國將軍厚燠厚燠與彰德知府傅汝
礪求祿汝礪亦囚其奴不與王使家人詣府求解汝
礪不見見時雨時雨復語侵之然王殊無恙於時雨

也王暴薨成臯王懼得罪罪汝礪時兩威逼之以狀
聞世宗詔械繫京師論汝礪戍極邊時兩歸斬於趙
時論寃焉垓薨子翊綜嗣綜薨子今王常洵翊綜父
子風流儒雅駸駸然方駕河閒矣

趙恭王一子

世子翊錙諡安

安王一子

今王

今王三子

世子由松

二子三子皆幼

臣爲郎時趙自王而下凡六百二十有三宗

昭九子

宣宗而外凡八王

鄭王

越王

蘄王

襄王

荆王

淮王

滕王

梁王

衛王

鄭靖王瞻竣母李賢妃成祖二十二年用皇孫封章
帝四年之國國鳳翔以隴人多癭英宗前九年改國
懷慶王多暴怒杖人至死稍不如意輒擊殺之英宗
爲置强相以御史周瑄爲長史後稍戢王四十三年
薨子祁鐸王王爲世子時棄妃而立妾王有子見滋

不愛也每言見滋母韓氏齷齪百歲後難與同廟見
滋是我爲世子時予如何襲得王爵聞人諫輒忿怒
天順三年召入朝戒諭之王二十八年薨諡簡見滋
不及封予祐杓王進見滋僖王祐杓五十一年薨諡
康亡後東垣王祐擇以簡王孫入繼進其父見湏爲
定王祐擇居喪能毀王十三年薨諡懿子厚烷王肅
帝六年也初簡王有子十餘人長見滋次見湏見湏
見滋之母有寵於王王愛見滋而弗教也及長封盟
津數行不順王惡之至於父子交訟純帝廢見滋爲
庶人幽高牆故懿王王久之盟津王子祐樞長求復

故爵王不與奏祐檮怨王王讀書能文折節下士然
多泥古府中故有習樂之所王盡改其名舍曰中和
繹舍堂祀伏羲神農黃帝曰原始之堂室曰思誠之
室後室曰祕器之藏其它館第皆以古義名名疑於
天子嘉靖二十七年鎮國中尉周王孫勤熨者故嘗
得過於周王周王以聞世宗奪其祿勤熨失祿乃詣
闕上書極諫若爲名高也者其書曰陛下躬上聖之
資不法古帝王兢業萬幾擇政任人乃溺意長生屢
修齋醮興作類仍數年以來朝儀久缺委任匪人遂
至賄賂公行刑罰倒置奔競成風公私殫竭脫有意

外變臣不知所終邇者天心仁愛災異疊徵而不下
罪已之詔諸大臣亦無避路之章慶瑞頌符接口連
牘恐非所以承天變伏惟皇上念祖宗創業之難敬
昊天顯道之戒復視朝之禮罷土木之工開忠諫之
路屏邪枉之人則天意可回人心用勸將與唐堯虞
舜齊名等齡臣言出禍隨顧得從劉向李勉趙汝愚
同遊地下不恨疏入世宗怒坐勤熨謗訕降庶人幽
高牆居亡何王上萬壽表失臣帝固怪之又亡何帝
醺祐樗來獻香王則不使而獨作四箴十連珠以諷
切帝其書曰臣聞孔子曰德之不修學之不講聞義

不徙不善不改是吾憂也孔子大聖猶以不學亡德
爲憂兄時君邪臣伏見太祖皇帝起淮右身遊四方
居無容膝垂及三載備歷艱難及有志天下統一寰
宇則躬擐甲胄膚冒風雪歷十五載然後乃能逐胡
元平四川收八閩安百姓攘四夷功可謂大矣德可
謂盛矣事可謂危然而後安矣尚慮喪亂以來教阻
道晦民庶懵迷乃復求書廣見求言廣知朝政夕講
寒暑不替餘風騰波及於外國以至琉球諸王遣子
入學然猶勞瘁時臻民隱日察靡敢戲豫所以繼唐
虞竝湯武也洪惟皇上御製心箴註四箴碑幽風書

逸揭洪範篇大學衍義下詢疾苦身先農桑益身
保民莘莘忘倦臣所親見何及邇年罷講有日美政
無聞使四方學士利欲紛拏莫知所從守藩下臣願
陛下講學勤政求祖宗之初治問百姓之安危臣不
勝拳拳効李德裕丹袞之箴倣陸機連珠之體凡十
四章別錄敬進陛下萬幾之暇取次覽觀臣厚煖不
勝愛君之至四箴曰居敬曰窮理曰克己曰存誠其
連珠十篇曰臣聞連城之璧不付於拙工千里之驥
必託之善御是以脩身者以損德爲憂保國者以失
賢爲慮臣聞如砥之途人以爲邪徑彌天之語人以

爲上乘是以孔孟之門無人而異端雜起堯舜之世
既遠而治道難興臣聞衣食足而民富禮文衰而訓
靡是以農桑必盛於風俗之始彝倫必明於教學之
時臣聞百口言善所以尊侈一心詢過所以希天然
則諛舌易異苦口難便是以堯嚳咨而裕受拒諫而
謫臣聞水滿易溢月盈易虧是以守謙者不挾德而
侮去患者不俟禍而追臣聞竭民脂而作無益者世
不知惜長國家而損下利者士謂非忠然則民饑而
君無獨富農足而國不能凶是以愛民則福錫於邦
趾虐下則禍起於舟中臣聞文公簡禮春秋加貶鄒

衍繫獄夏月飛霜然則不誠獲戾罔察惟殃是以畏
威者克謹天戒敬祖者率由舊章臣聞商鞅尚法秦
旋踵以亡仲尼行仁魯三月而治是以萬類取足得
衆尚於用寬百姓無匱求仁先於近譬臣聞臨春於
閣陳禍以盈步虛於城宋室將毀是以成湯寬仁不
聲色是親放勳恭讓不茅茨爲耻臣聞被衣寒體充
食餒腹民日惟憂耕田南畝鑿井西鄰人日惟憚然
則與以惠者欲其知樂以利者忘其力是以熙皞而
王者之爲驩虞而霸者之策旣奏帝大怒下鄭人獄
中手詔曰日者勤慰謗訕朕躬朕姑活之厚煖敢効

尤彼小豎子耳爾今西伯也諸欲爲爲之祐樁因帝
之怒王也撫拾王罪四十章誣王反上使駙馬詔太
監堪往視還報反亡驗信惑小人治宮館名號疑乘
輿則有之而方掉弄章句譏謗至尊上曰厚烷橋傲
不稱臣百凡自擅掇拾朕過無禮不道降庶人囚之
王囚高牆十八年莊帝卽位乃出復其爵王自少至
老布衣蔬食而已自封至復王凡五十五年薨謚爲
恭而前盟津王亦稍白得復爵賜諡王世子載堦讀
書樂道有恭王風恭王之囚也世子不敢室築一室
王宮門外席藁以居如王囚之年數王薨世子曰鄭

宗之序盟津爲長前王復爵與諡矣爵不宜我固遷之山中其後竟立祐樁之曾孫載璽爲王

鄭靖王四子

簡王

新平王祁銳夭亡子除

涇陽王祁銑信讒撥置世子逼人致死天順三年召入朝戒諭銑薨子見溢嗣溢爲世子荒淫亡度母妃張氏常制教之母薨溢殺一犬殮而埋祭之以比母及襲封宿娼喪次妃郭氏泣諫溢怒撲之宮門絕其飲食笞殺其從婢復強納母妃女弟爲妃兄所奏孝

宗八年革爵除

朝邑王祁鎔亡子除

鄭簡王十子

世子見茲追封僖

盟津王見蒧王出府別居竊世子金冊以去他日復入簡王宮欲取寶簡王索出其世子冊以是怨簡王遂不復朝凡朝廷慶賀進表箋禮皆廢他日輿而過涇陽王門見涇陽王不下妹廣寧郡主及并府中製臥牀奩具碎而焚之又強娶良家子爲宮婢多占軍較至百餘人簡王不能制以奏聞純帝二十年革爵

令戴平巾習禮讀書敬帝卽位得歸及沒肅帝賜諡
子祐椿多行不義惡於恭王

東垣王見湏王狎家奴安童數欲殺其妃憲宗斬安
童祿王爲民久乃復王薨以子懿王進封追諡定懿
王庶子厚烱仍襲東垣爵烱薨子載塏立塏薨子翊
鎧立

河陽王見瀉殤除

信陽王見浪殤除

宜章王見洲夭亡子除

繁昌王見瀉瀉薨子祐榜立榜薨子厚燦立

廬江王見浦南薨子祐梲立梲薨子厚光立長子載禪

丹陽王見淩亡子除

真丘王見消亡子除

鄭僖王二子

康王

祐憶殤

鄭恭王三子

世子載堉

德慶王載堉薨子翊鏐立

崇德王載陞亡子除

臣爲郎時鄭自王而下凡二十一宗

靳王瞻垠不知其母故封靜樂王傅姚友直授王經
有顧問必正對王雖幼知賓禮之王早卒諡莊獻昭

帝卽位追諡獻

姚友直名益以字行浙江蕭山人洪武進士授中書舍人累陞司經

局洗馬宣廟爲皇孫時奉命授書并授靳王臣左春坊左庶子及滕王建國雲南陞雲南左參政掌長史司事滕王薨因事至京宣廟嘉念舊勞擢太常寺卿

越靖王瞻墉母昭皇后永樂三年用皇孫封衢州未
之國薨妃吳氏殉諡貞惠亡子除

襄憲王瞻墉母昭皇后永樂二十二年用皇孫封王

讀書通詩尤長春秋宣宗四年之國長沙正統初言
長沙卑濕請遷亢爽地睿帝居之襄陽帝北狩其時
諸王中王最長親且賢朝議以國家有故非長王無
以填之謀迎立王子既不果郕王攝王上書皇太后
請立睿帝太子急發府庫募勇敢士迎鑾而令郕王
加意監國之政而郕王隱之不以聞太后書至已立
爲皇帝矣郕王卽位又上言陛下誕登寶位非從上
皇冊封若稍失臣節宜旦夕遣使視膳朔望率羣臣
問安以不失恭順之意睿帝復辟于謙王文坐謀迎
王子誅疑王與有謀而王實不知久之從宮中得王

所爲二書賜書遺王比於金滕召王朝既見甚懼使
詣謁長獻二陵歸上章言伏覩皇太后制諭廢郕王
如漢昌邑王臣讀漢書霍光因昭帝無後援立昌邑
以承漢祀初無篡奪之非郕王承皇上寄托之重乃
乘危篡位改易儲君背恩亂倫非昌邑比臣閱其所
葬杭氏壽陵高聳僭擬長獻臣不勝憤悼伏望夷毀
以明禮法上從之河南按察使王槩坐誣繫獄王過
河南河南父老遮王車訟槩王訪槩爲吏誠善及小
見賜宴酒半王跪席舉身爲上言日從洛中來洛父
老所以遮車訟槩狀上立命召爲大理卿

王槩廬陵人正統壬

戊進士起家刑部郎歷湖廣河南參政河南按察使
巡撫陝西人爲大理寺卿刑部尚書槩所歷多在法
司精習律比了決無宿案凡以要結至者測情協律
指摘過誤庶謬不少假借以故諸法吏相率爲明慎
刑用不枉其所爲斷案繳駁法吏亦轉相成抄寫傳
以爲式率誼恭毅子文年十六舉進士以翰林出爲
廣西王出有二都督犯駕內侍以聞上怒庭杖二都
督王人謝曰臣出無駕二都督何從知之若罪二都
督是臣爲阱於二都督也上竟赦二都督杖王數欲
逐國上特賜護衛及旗手司鷹坊司食鹽三千引官
其二夫人之第二乳母之夫皆爲百戶春秋上戊祭
社稷山川賜陪祭官懸帶牙牌又賜之襄王之寶雕
玉篆曰以識密奏上曰昔周公有大勳勞成王寵以

天子禮樂叔父豈下周公姪欲加叔父宮殿黃琉璃
瓦王踧踖辭奈何以臣壞祖宗之典訓且居第當傳
孫子用陶瓦世世相安也上曰善及行上送至午門
外王逡逡若有所言上曰叔父何言王頓首曰今海
內之民財殫力痛望陛下如望慈父母願陛下省刑
罰薄稅斂以荅海內心上拱手謝王還上及太后思
王不已四年復召王王至上諭廷臣曰吾叔父襄王
天下第一賢王也其以朕言勝於宗人之府三時迄
國御製峴山漢水二賦及襄陽四時歌以榮之王行
上送至蘆溝橋駕在王後王辭以臣先君大亂之道

也上曰今日姪送叔非君送臣叔父何辭之與有王
不得辭反其車以面上六年復迎王以老辭上歲致
存問諸藩自谷王後皆禁不朝王獨以小心清慎守
法遠嫌得來朝者再在位五十年薨子祁鏞嗣在位
十年薨諡曰定子見淑嗣在位二年薨諡曰簡子祐
材嗣王聽其妃父井海左使多筆殺人孝宗中降勅
切責海及王所親信俱戍邊在位十四年薨亡子諡
曰懷弟祐楯以光化王進封在位四十三年薨亡子
諡曰康始懷王好玄脩復好鷹犬蓄善馬日行八百
里一日騎往南陽返而日未曛又嗜女色宮中賞賜

無節兼有鬱攸之變先世蓄積爲一空康王之嗣也
嘗命道士禱雨而應遂奉道好五雷法嘗無故煉神
忽見一長人高六十七丈許青面赤髮黃巾金甲執
鉞鞭立庭前因悸終其身年八十五薨二王同月生
也而皆好道教初簡王夢兩道人相採髮絲端禮門
直入王宮遂生二王而皆以好道康王薨無子其從
姪厚頰以陽山王進封陽山王者定王次子見滂之
孫而祐楬之子也追封見滂爲恭王祐楬爲惠王王
之嗣王也幼鎮寧王祐樞攝之世宗南狩承天廉王
長進王王焉王初爲王國資縮甚乃折節爲儉攝敵

衣冠居外廐不厭稻粱遂能節祿米之美以助於王
家嘉靖三十年虜犯順王進銀二千助軍三十六年
三殿災王進銀三千桺木十世宗兩賜獎勞卷衣一
襲王事嫡母王太妃及潘太妃至孝潘太妃薨王殯
之左偏王太妃曰汝母有爾絜社稷是賴其何有於
正寢左之以我乎仍正寢王泣曰臣非敢有違臣不
忍以非禮加臣母及葬跣而扶輓行五十里王愛襄
人左右不使犯有司四方士大夫道襄者率先施禮
與爲韋布交人爲之語曰夫人入楚也山不登太和
王不朝于襄云何之徜徉王在位十五年薨諡曰莊

子載堯嗣爲今王

襄憲王三子

定王

寧鄉王祁鏞亡子除

棗陽王祁鉦鉦薨子見汚立汚薨子祐惲嗣善文章
精騎射力能制奔馬博涉星曆兵農醫卜之書言休
咎多中好持論經濟之術嘉靖初上書世宗請伯孝
宗考獻皇帝世宗褒諭之更請除宗人祿使其以四
民自爲生賢者用射策應科寢不行康王爲王病廢
不能事承奉邵亨挾權自恣拷死王舅王惡之剔其

兩目坐奪爵嘉靖四年也十八年上符承天念王前
疏復王王薨今王厚燭嗣長子載墀

襄定王三子

簡王

陽山王見涉涉薨子祐楫嗣以子莊王進封郡爵除
鎮寧王見渙寬仁樂善王薨子祐樞嗣樞薨子厚燄
嗣長子載堪

襄簡王二子

今王以安福王進封

鄖城王載堉先封隆慶避穆宗年紀改今封

永城王載圻亡子除

臣爲郎時襄自王而下凡三十有七宗

荆憲王膽桐母張妃永樂二十二年用皇孫封宣德
四年之國建昌正統十年改封靳勤學好古祇慎肅
恭延攬文學之士王三十年薨子靖王祁鏞立王七
年薨子見瀟立初靖王生三子見瀟荆王見溥都梁
王見潁樊山王見瀟與都梁同母母妃愛都梁常多
予之金帛見瀟素不平及王錮母妃斂其衣食竟死
將葬出柩於竇召都梁王入後圍騎射擊之以鏃尺
塞其口捶殺之鑽火王肛謂王妃何曰都梁王與王

騎射後園馬驚踐死因逼淫何妃於後宮王從弟懷
順王見潭之妻茆妃美求通焉懷順王母馬妃懼防
之王怒髡馬妃鞭之百餘擥懷順王囊土壓其面王
怒械繫茆妃入宮脅姦之數集惡少年騎射微服涉
漢略人美妻女其聚斂不可勝道惡鎮國將軍見溢
見流閉之空舍餓死之樊山王懼其及也密聞於孝
宗孝宗使太監俊駙馬都尉震御史珊徵王王至上
使諸王與文武大臣議罪諸王文武大臣皆曰見瀟
罪惡深重不赦於刑書上曰寧末減削爵降庶人綱
西內賜何妃死奪茆妃之封弘治四年也居二年見

肅從西內復撫奏樊山王過樊山王曰昔者大行皇帝遺詔至荆見肅拒不內見肅居荆多置弓弩築土山簡舟閱馬廣儲生鏃聚輿械其子祐柄濟惡謀不軌向未盡言耳乃敢誣奏我遂更上王前事上使覆視有之乃賜見肅自盡廢祐柄而封都梁子祐櫛為王是為和王王十年薨子端王厚烺立端王有賢聲景泰中上書請朝上皇不許荆長史施魯賢者也王厚遇之施魯仁和人學古守高耻為遇合為長史以正道匡王是非介然不阿王為疏請增秩魯以方嚴簡亢不為劉瑾所悅矯勅致仕瑾誅起用辭不赴魯無一畦尺橡之藉東西僑賃不常非其義不受王四十六年薨子載堃先王卒孫恭王翊鉅立進

封載城爲莊王恭王十六年薨子常冷先坐罪革爲庶人弟敬王常信立王一年薨亡子弟常盍立爲今王世子由樊

荆憲王二子

靖王

都昌王祁鑑鑑薨子見潭立潭死於見瀟子祐鶴立
鶴薨子厚熙立熙薨子載塔立載塔佯狂放紛至扶
人眼長子翊鋒先卒子常濡未封

荆靖王三子

庶人見瀟

都梁王見溥爲見滿所殺見滿廢子祐欄進王郡爵
除有宗室

樊山王見溥溥薨子祐構立構薨子厚峻立峻薨今
王載圻立王讀易窮理折節士大夫閒諸王通刺士
大夫故不名王獨名郡王女得封而請祿於朝王有
四女不爲請下嫁於士人隆慶中請自試不報長子
翊鉅翊鉅與其諸弟翊鏐翊鏐皆工詩兄弟相唱和
號花萼社

荆和王三子

端王

富順王厚焜幼孤未就傅稍長媿與其長者語乃潛心學問至忘寢食薨子載堦立堦薨子翊堤立爲今王長子常涵

永新王厚燠能詩薨子載壕立壕薨子翊鍵先卒孫常渭立爲今王

荆端王一子

永定王載堦以子恭王追諡莊郡爵例除有宗室

荆莊王二子

恭王

德安王翊錯薨

荆恭王三子

世子常泠隆慶三年以罪降庶人

敬王以泰寧王進封郡爵例除

今王

今王四子

世子由樊餘子以王進封格於例不得郡王爵

臣爲郎時荆自王而下凡百四十有五宗

淮靖王瞻塽母曰李妃初國韶英宗以韶瘴擇饒徙居王朝長史李伯嶼從左右請有他求與伯嶼不可曰朝廷之上有賜無求賜則惠求則瀆王病府中人

請爲王祈福伯嶼曰何如貸丁錢以甦衛士之困王

皆從之

李伯嶼上海人爲桐廬訓導識姚夔於諸生間于登清並舉進士恬狷有聲清官南刑部

丁艱服缺夔時爲吏部尚書欲留之北

王薨凡二十

三年王子祁銓立諡爲康王凡五十五年世子見濂

早卒弟清江王見澂子祐棨嗣立追諡世子安王清

江王端王王遊戲無度左右倚勢橫暴境內苦之左

長史莊典以王不順請自免詔止之會饒州推官汪

文盛與王府不相悅有顧嵩者病風持刀撞入王門

大叫王執詰之嵩謬言汪推官使我來殺王典以告

鎮巡官時鎮守太監黎安以事至饒其隨騎近端禮

門被撻安以爲辱怨王而先是王有名琴焉曰天風
環珮其音殊絕寧王宸濠謀之不得又求王濱湖地
王弗與坐是嗾安舉奏王過典不能抹併及文盛被
誣事王亦奏辯下撫按詳訊安與宸濠謀不候報遽
逮典及府中官較鞫之典詞不遜宸濠復使人將至
府箠擊之死獄中他所連死甚衆於是王奏安挾仇
殺典以脫嵩及縱參隨堂等嚇取民財上遣司禮太
監張欽都御史金獻民錦衣指揮使薛璽往按王畏
宸濠不敢奏欽等又爲安諱護遂言王聽信奸徒爲
惡請嚴戒之淮府軍較坐戍邊者二十餘人刑部覆

奏詔從之而典寃竟弗白正德十年也王薨諡爲定
王凡二十年亡子弟鎮國將軍祐楨立諡爲莊王凡
十三年子厚燾立諡爲憲王凡二十五年子載堉立
薨諡爲恭王凡二十一年世子翊鏡早卒弟建昌王
載堅嗣立薨

淮靖王三子

鄱陽王祁鎮亡子除

康王

永豐王祁鉞鉞薨子見淨立見淨文而好士得教授
李勳知其賢請以爲子師亡何薨子祐柄居王喪不

敬勳以書諫王庶幾改之他日勳辭王歸王曰嘻吾
可一日無先生勳吉水人相薨子厚炆立炆薨子載址不
及封址子翊釵立長子常灝

淮康王七子

安王以世子卒亡子用姪定王追封

端王先封清江用子定王追封郡爵除

南康王見洽洽薨子祐祠不及封子厚燾立長子載
趨

德興王見渚渚薨子祐槿立槿薨子厚燾立燾薨長
子載堦孫翊鍊

見汴未封卒

順昌王見澤澤薨子祐從立從薨子厚煊立煊薨子載圭

崇安王見洵洵薨子祐幹立亡子除

淮端王二子

定王

莊王以鎮國將軍進封

淮莊王八子

憲王

高安王厚炁炁薨子載堦立堦薨今王翊鈇立

上饒王厚燭燭薨今王載塙立

吉安王厚燔燔薨子載堞

廣信王厚煤煤薨長子載堡

厚燮未封卒

嘉興王厚燿燿薨子以擅婚降奉國將軍

紹興王厚燠長子載封長孫翊羶

淮憲王四子

恭王

今王以建昌王封

金華王載塙子翊銷

名山藏 卷之二十九 四
華陽王載域亡子除

淮恭王一子

榮昌王翊鏡亡子以弟建昌王王追諡昭

臣爲郎時淮自王而下凡一百有四宗

滕懷王瞻塏母郭妃仁宗卽位用皇子封國雲南未
行薨年十七除

梁莊王瞻埶與滕懷王同母仁宗卽位用皇子封國
安陸仍郢邸姿度英偉好學不倦襄獻王自長沙徙
安陸道王國王相見甚歡辭去至泣下亡何薨凡王
十八年亡子除

衛恭王瞻埏與滕懷王同母仁宗卽位用皇子封懷
慶未之國正統三年薨亡子爲人孝謹好學以賢聞
王薨妃楊氏殉諡貞烈